

# INUIT ATAQATIGIIT

## INATSISARTUNI



18. august 2009

UKA 2009/40

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Piniartut aalisartullu piffissap ilaanni inuuniarnikkut ajornartorsiulernerminni pisortanit ikiorserneqarsinnaanerisa pitsaanerulernissaat siunertaralugu sulisoqarnissaanik Naalakkersuisut peqquneqarnissaanik Inatsisartut aalajagiffigisassaattut siunnersut.**

(Inatsisartunut ilaasortaqaq Hans Aronsen, Inuit Ataqatigiit)

### **Tunggavilersuut:**

Ilaqutariit meeqqanik pilersugaqartut piffissap ilaanni inuuniarnikkut ajornartorsiuteqalersartut eqqarsaatigalugit oqallinnermi ilangullugit taaneqartarput ilaqutariit piniarnermik aalisarnermillu inuussutissarsiortumik pilersuisoqartut. Pisortanit ikiorsiissutit pillugit inatsisartut peqqussutaat nr. 14, 20. november 2006-imeersoq kingusinnerusukkut allangortinneqartoq malillugu piniartut aalisartullu ikiorserneqarsinnaanerit ajornanginnerulersimagaluartoq sulii ajornartorsiutitaqarpoq.

Pisortanik ikiorsiissutit pillugit inatsit nunami sulinermik inuussutissarsiutillit atugaat najoqqutarinerullugit ilusilersugaammat, piniarnermik aalisarnermillu inuussutissarsiutillinnut inuuniarnermi ajornartoormi pisortanit ikiorneqarnissamik saaffiginninnermi ajornartorsiutissiisarpoq.

Ikorsiinermi annertussusiliineq SIK-p pisortallu akornanni nunami sulisut isumaqatigiissutaat malillugit annertussusiligaapput, akiligassat aalajangersimasut suussanersut nunami aalajangersimasumik suliffeqartut akilersortagaat malillugit annertussusiligaallutik, aammalu nunami suliffeqalernissamat piareersimanissaanik piumasagaatitaqarlutik.

Inuussutissarsiutigivillugu piniartut aalisartullumi ikiorserneqarnissamat piumasagaatinik amerlasuutigut naammassinnissinnaasannngillat. Ukiariartornerani aammalu sikuusartumi sikuilernerani sila ullorpassuarni angallavissaajunnaaraangat piniarnermik aalisarnermillu inuussutissarsiuteqartut inuuniarnerminni meeqqaminnullu pilersuiniarnerminni ajornartoorsinnaasarpot. Pisortaniillu ikiorsiissutinik qinnuteqaraangamik nunami suliffeqalernissamat piareersimanissamat piumasagaat naammassisinnaasannngilaat silagissippat aallaqgeriannaasaramik. Piniartummi aalisartullu silamik peqquteqartumik angalasinnaannginnerminni piniutigissartarput aammalu piniutitik nakkutigiuannartarlugit. Taamaammallu nunami suliffinnut suliatoriaannartut inissisimaneq ajorput, tamakkulu pissutigalugit pisariaqartitsivinnermi aammalu meeqqaminnut inuussutissamik pilersuiniarnerminni ikiorsiissutinik qinnuteqarnerminni ajornartorsiortinneqarlutik.

Ikorsiinermi aamma piniartut aalisartullu nunami suliffilinnut sanilliullugit allaanerusunik aningaasartuuteqartarnerat eqqarsaatigineqarneq ajorpoq, angalaqqilernerme orsussamat patroninut allanullu piniarnermi aalisarnermilu pisariaqartinneqartunut aningaasartuuteqartariaqarnerat eqqarsaatigineqaratilluunniit apeqqutaatinneqarneq ajorput.

Siunissami nunatta pissarititaannik pilersorneqarnissarput pisariaqartittuassagatsigu piniussisoqarnissarput aalisartoqarnissarpullu pisariaqartittuartaavaarput, taamaammatt aamma ajornartuinnermi pisortaniit ikiorserneqarsinnaanermut taakkununga nunami suliffilittuulli naleqqussakkanik periarfissinneqartariaqarput.

Tamanna pisariaqartoq erserseqqinneqarpoq meeqqat kaattut pillugit Qaasuitsup kommuniani innuttaasunik oqallitsitsinermi.

Taamatut oqaaseqarlunga neriuutigaara siunnersuut pingaarutilittut isigisarput Inatsisartuni ilaasortanit ilassilluarneqassasoq.